

元遺山詩集箋注

元遺山詩集箋注卷十一

烏程

施國祁北研箋

蔣炳枕山校

五言絕句

洛陽高少府瀍陽後庵五首

溪上弄明月風露發新警  
心空無一塵萬竹埽秋影  
一水隨人意蔬畦復芋溝  
風波河洛近莫放出山流  
韭蚤春先綠菰肥秋未黃  
殷勤遶畦水終日爲君忙

韭菰

南史周口傳春初  
早韭秋末晚菰

地僻境逾靜林疎秋已分  
清溪一片月脩竹四山雲  
方外人長樂山中物自幽  
百年梅福隱萬古謫仙游

梅福

漢本傳字子真壽春人補南昌尉上書不  
納去妻隱于會稽變姓名爲吳門市卒

雜詩

中州集敘之兄詩有讀裕之弟詩葉有鶯聲柳巷深之句題三首其後云阿翁醉語戲兒癡說著蠅詩也道奇吳下阿蒙非向日新篇爭遣九

泉知鶯藏深樹只聞聲不著詩家畫不成慙愧阿兄無好語五言城下把降旌傳家詩學在諸郎割腹留書死敢忘背上鋪囊三箭在直須千古說穿楊○案本集敘之墓銘歿于貞祐二年三月北兵之禍則先生作詩時尚未南渡安得在三鄉內鄉耶二字削去竟題作雜詩為是

大吹桃源近鶯聲柳巷深蒼苔留醉臥青竹伴幽尋

薛明府去思口號七首

史王浩傳薛舉法行縣令得人甚多如咸寧令張天綱長安令李獻甫洛陽張特立三人

有傳餘如興平師夔臨潼武天禪汜水完君玉偃師王登庸高陵宋九嘉登封薛居中長社李天翼河津孫鼎臣陝城李無黨萊陽李過庭尉氏張瑜長葛張子王猗氏安德璋三原蕭邦傑藍田張德直葉縣劉從益皆清慎才敏極一時之選○中州集趙宜之薛鼎臣罷登封詩弄人鼓笛不相疑便著當場傀儡衣終日抱饑惟飲水和醉客一時歸注云鼎臣材大夫有惠政今以例罷故有上句○本集登封令去思頌云侯名居中字鼎臣○續夷堅志天壇中巖有仙猫洞王屋令臨漳薛鼎臣呼之而應親為予言

能吏尋常見公廉第一難只從明府到人信有清官

畫諾由官長昂頭顧吏頻只從明府到判筆不傳神

畫諾

後漢黨錮傳汝南太守宗資任功曹范滂語曰汝南太守范滂南陽宗資主畫諾

麋鹿山中盡公厨破幾錢只從明府到獵戶得安眠  
木索人何罪纍纍滿獄中只從明府到牢戶二年空  
驛舍無歌酒清談了送迎卽看明府去畫鼓有新聲  
舊日逃亡屋鎌鉏色色新卽看明府去還作賣牛人  
疾惡看平日天然御史材豪姦休鼓舞驄馬卽西來

明府

後漢張湛傳明府郡守所居曰府明府者尊高之稱前書韓延壽爲東郡太守門卒謂之明府亦其義也又張儉傳明庭注猶明府也賁退錄明府漢人以稱太守唐人以稱縣令

### 山居雜詩六首

瘦竹藤斜挂叢花草亂生林高風有態苔滑水無聲  
石潤雲先動橋平水漸過野陰添晚重山意向秋多  
樹合秋聲滿邨荒暮景閑虹收仍白雨雲動忽青山  
川迴楓林散山深竹港幽疎煙沉去鳥落日送歸牛

漲落沙痕出堤摧岸口斜斷橋堆聚沫高樹閣浮槎  
鷺影兼秋靜蟬聲帶晚涼陂長留積水川濶盡斜陽

梁父吟扇頭

孔明箕踞坐大石上望月作梁父吟

槃礴萬古心塊石入危坐青天一明月孤唱誰與和

南樓月夕望鳳山有懷武鍊師子和

中州集趙開閑代州詩萬古河山雄朔部四時

風月八南樓本集十三卷代州門外南樓詩又發南樓度關詩又三十四卷南山行記先東巖君生平愛鳳山然竟不到予年二十許與客登南樓說山中事北渡又十年每過雁門驚學武尊師子和必以此山爲言又十四卷麋鹿圖詩

相望不相見山中君得知南樓今夜月也到洗參池

洗參池

兩山記來儀觀北有洗參池

辛亥寒食

寒食年年好今年迥不同秋千與花影併在月明中

山中晚春

雲光金碧聚林煙綵翠新山花發較晚今年兩見春

得緯文兄書

見十卷別詩

鵲語喜復喜山城誰與娛青燈一杯酒千里故人書

乙巳九月二十八日作

關山小雪後絮帽北風前殘月如新月今年老去年

六言絕句

定齋兄寫真

見十卷  
香詩

朱黃筆底三篋白黑胸中兩碁畫作蕭然野服雲龍蔽日駢  
駢

巨然秋山爲鄧州相公賦

見七卷  
月觀詩

筆端游戲三昧物外平生往還爲問阿師何在白雲依舊青  
山

德和墨竹扇頭

靜裏離離新粉動時細細清香明月清風自在紅塵白日何

妨

嫩香新粉墨離  
離李長吉竹詩

曹得一扇頭

見五卷南  
冠行注

機中秦女仙去月底梅花晚開只見一枝疎影不知何處香  
來

唐子達扇頭

溪光冷於冰山骨淨如玉白雲自老人自閑莫遣秋風破茅  
屋

七言絕句

論詩三十首

丁丑歲三都作○養新錄元遺山論詩絕句效少陵更信文  
章老更成諸篇而作也王貽上仿其體一時爭效之厥後宋  
牧仲朱錫鬯之論盡屬太鴻之論詞論印  
遞相祖述而七絕中又別啓一戶牖矣

漢謠魏什久紛紜正體無人與細論誰是詩中疏鑿手暫教

涇渭各清渾初白評云分明自任疏鑿手

漢魏

宋謝靈運傳論周室既衰風流弥著屈宋賈馬以降情志愈廣王劉揚班崔蔡之徒遞相師祖雖清詞麗曲時發于篇而無音氣固已多矣至于建安曹氏

基命二祖陳王咸著盛藻自漢至魏文體三變○石林詩話嘗怪兩漢間正體杜甫

听作騷文初未嘗有新語直句句規模屈宋但換字不同雖工何足道

絕句云別裁偽體親風雅轉益多師是汝師○韓愈薦士詩五言出漢時蘇李首更號東都漸涉漫派別百川導建安能者七卓犖變風操○蘇軾詩大雅初微缺流風因暴

曹劉坐嘯虎生風四海無人角兩雄可惜并州劉越石不教

橫槊建安中

曹劉

鍾嶸詩評陳思為建安之傑公幹仲宣為輔五言之冠見○魏書越石詩評

曹丕與吳質書公幹有逸氣但未遒耳至其五言詩妙絕當時

鄴下風流在晉多壯懷猶見缺壺歌風雲若恨張華少溫李

新聲奈爾何

鍾嶸評張華詩恨其兒女情多風雲氣少

缺壺歌

晉王敦傳酒後輒詠魏武樂府歌曰老驥伏櫪志在千里

張華

詩評張華詩其體華

艷興託不奇巧用文字務為妍治雖名高義代而疏亮之士猶恨其云云

溫李

唐李商隱傳今體儼偶繁縟與溫庭筠段行塵雜不脩邊幅多為側詞艷曲逐絃吹之音○四友齋詩說

齊梁體自盛唐一變之後不復有為之者至溫李始復追之

一語天然萬古新豪華落盡見真淳南窗白日羲皇上未害

淵明是晉人

陶淵明唐之白樂天

天然

韻語陽秋欲造平淡從粗麗中來落其粉華然後可造平淡之境太白云秋水出芙蓉天然去雕飾平淡而至天然則善矣

縱橫詩筆見高情何物能澆硯磊平老阮不狂誰會得出門

一笑大江橫

高情

詩評嗣宗詩其源出于風雅無雕蟲之巧而詠物詠懷可以舒性靈發幽思言猶耳目之內情寄八荒之外洋洋乎使人忘其鄙近自致遠大○滄浪詩話黃

初之後惟阮籍詠懷之作極為高古有建安風骨

硯磊

世說王孝伯問王大阮籍何如司馬相如王曰大阮籍何如司馬相如

不狂

春秋籍口不論人過而自然高邁○文選阮籍詠懷詩性嗣宗身仕亂朝常恐履禍過禍因茲發詠故有憂生之嗟雖志在刺譏而文多隱避百代之下難以情測故粗明大意略其

幽旨

出門

山谷水仙花句

心畫心聲總失真文章寧復見為人高情千古閑居賦爭信

安仁拜路塵初白云古來文行背馳者多矣豈獨一安仁哉

畫聲法言言心聲也書心畫也閑居賦晉潘岳傳字安仁性輕躁趨世利與石崇等詬事賈謐每候其出與崇輒望塵而拜然仕官不達乃作閑

居賦序云予讀汲黯傳司馬安四至九卿良史題以巧宦之目未嘗不慨然廢書嘆曰巧誠有之拙亦宜然予自弱冠至于知命雖通塞有遇亦拙者之效也乃作閑居賦以

情焉

慷慨歌謠絕不傳穹廬一曲本天然中州萬古英雄氣也到

陰山敕勒川初白云拔出中州勅勒歌大為北人洩氣

歌謠韓愈送董邵南序燕趙古稱多感慨悲歌之士敕勒川北史斛律金傳唱敕勒歌云敕勒川陰山下天似穹廬籠蓋四野天蒼蒼野茫茫風

吹草低見牛羊

沈宋橫馳翰墨場風流初不廢齊梁論功若準平吳例合著

黃金鑄子昂初白云平吳二字妙在關合齊梁

沈宋唐文苑傳建安後訖江左詩律屢變至沈約庾信以音韻相婉附屬對精密及宋之閒沈佺期尤加靡麗同忌多病約句準篇如錦成文學者宗之號為沈宋

齊梁

隋李諤傳齊梁體最綺靡故曰連篇累牘不出月露之形積案盈箱盡是風雲之狀

平吳例

吳越春秋句踐滅吳范蠡既去越王使良工鑄

金象范蠡之

子昂

韓愈薦士詩國朝盛文章子昂始高蹈。郡齊讀晉志唐興文章

形置于座側

承徐庾餘風天下祖尚至子昂始變雅正名人無不推之。後邨

詩話唐初王楊沈宋擅名然不脫齊梁之體獨陳拾遺首唱高雅沖淡之音一掃六代

纖弱超于黃初建安矣及觀感寓數篇皆蟬蛻翰墨畦徑讀之使人有目空四海神游

八極之興

鬪靡誇多費覽觀陸文猶恨冗於潘心聲只要傳心了布穀

瀾翻可是難

陸蕪而潘淨語見世說。初白云爲恃才騁詞者下一針

潘陸

世說孫興公云潘文爛若披錦無處不善陸文若排沙揀金往往見寶

布穀

蘇軾詩口角瀾翻如布穀

排比鋪張特一途藩籬如此亦區區少陵自有連城壁爭奈

微之識砭砭

初白云此因李杜優劣論而發

排比

元稹杜工部墓銘云詩人以來未有如子美者山東李白亦以奇文取稱時謂李杜至若鋪陳終始排比聲韻大或千言次猶數百詞氣豪邁而風調雨順

對精切而脫棄凡近則李尚不能歷其藩籬况堂奧乎

連城壁

先生杜詩學引云竊嘗謂子美之妙釋氏所謂學至于無學者耳今觀其詩如元氣淋漓

隨物賦形如三江五湖合而爲海浩浩瀚瀚無有涯涘如祥光慶雲千變萬化不可名狀固學者之所以動心而駭目及讀之熱求之深含咀之久則九經百氏古人之菁華

所以膏潤其華端者猶可彷彿其餘韻也夫金屑丹砂芝朮參桂織者例能指名之至于台而為劑其君臣佐使之互用甘苦酸鹹之相入有不可復以金屑丹砂芝朮參桂而名之者矣故謂杜詩無一字無來處可也謂不從古人中來亦可也前人論子美用事有著鹽水中之喻固善矣但未知九方臯相馬得天機于滅没存亡之間物色杜人所共知者為可略耳

眼處心生句自神暗中摸索總非真畫圖臨出秦川景親到

長安有幾人初白云見得真方道得出

秦川三秦記曰長安正南秦嶺嶺根水流為秦川一名樊川○杜甫詩秦川對酒平如掌○案少陵自天寶五載至十四年以前皆在長安見諸題咏如元都壇之

子規山竹王母雲旗悲思塔之河漢西流七星北戶曲江三章之素沙白石杜曲桑麻麗人行之三月氣新水邊多麗樂游園之碧草烟絲芙蓉波浪漢陂行之棹龍間發水面藍關西南臺之錯翠南山倒影白閣湯東盤湫之陰火玉泉樓空浴日凡茲景物並近秦川一帶登臨俯仰獨立冥搜分明十幅畫圖都在把酌浩歌曠懷游目中一一寫照也○宋范寬有秦川圖

望帝春心托杜鵑佳人錦瑟怨華年詩家總愛西崑好獨恨

無人作鄭箋初白云後世箋李詩者未必即玉溪功臣奈何

錦瑟屬樊榭云此詩義山悼亡之作也錦瑟五十絃制為二十五是即其人生世之年故云思華年也今則如莊生之蝶望帝之鵲已化為異物矣然其珠光玉潤

容華出衆有令人追憶不能忘者在當日已惘然知尤物之不能久存不待追憶而始然也○案王溪此詩寫托似深後之解者言人人殊不能備載惟近時厲氏稍簡快不知與遺山意合否姑錄之西崑○古今詩話楊大年錢文僊晏元獻劉子儀爲詩皆宗義山號西崑鄭箋石林義山詩注云詩人論少陵忠君愛國之意直一飯不忘而目義山爲浪體鄭箋子以其綺麗華艷極玉臺金樓之體而已第少陵之志直其詞危義山當南北水火中外箱結之日不得不紆曲其旨與溫其詞此風人小雅之遺推原其忠義可以鼓吹少陵

萬古文章有坦途縱橫誰似玉川盧眞書不入今人眼兒輩

從教鬼畫符初白云掃靈鬼怪一派

坦途韓愈贈盧全詩往年弄筆嘲全異性詞驚衆玉川盧全號玉川子見本傳

出處殊途聽所安山林何得賤衣冠華歆一擲金隨重大是

渠儂被眼謾

出處晉謝萬傳善屬文叙漁父屈原季主賈誼楚老蒧勝孫登稽康四隱四顯爲八賢論其旨以處者爲優出者爲劣○宋顏延之傳作五君詠以述竹林七賢山

濟王戎以貴顯被黜擲金世說管寧華歆共鋤園中菜兒地有片金寧揮鋤與瓦石不異歆捉而擲之

筆底銀河落九天何曾憔悴飯山前世間東抹西塗手枉著

書生待魯連

銀河

半白望廬山瀑布詩日照香爐生紫烟近看瀑布挂前川飛流直下三千尺疑是銀河落九天

餘山

又詩餘顙山頭尋杜甫頭戴笠子日卓午試問

因何太瘦生總

書生

蔡寬夫詩話太白之學本出縱橫以氣俠自任當中原擾攘欲為從前作詩者藉王永以立奇功故其東巡歌有但用東山謝安石為君談笑

靜胡沙之句至平章南風一掃胡塵靜西入長安到日邊可見其志矣

切切秋蟲萬古情燈前山鬼淚縱橫鑑湖春好無人賦岸夾

桃花錦浪生

鑑湖

全唐詩話元稹廉問浙東有劉采春者自淮回來容華莫比元贈詩云在浙東七年醉題東武句云因循歸未得不是戀鱖魚盧侍郎簡永嚴曰丞相雖不為

鱖魚為愛鑑湖春色耳指采春也

岸夾

太白句

切響浮聲發巧溪研摩雖苦果何心浪翁水樂無官徵自是

雲山韶濩音

水樂大山事又其款乃曲云停機靜聽曲中意好是雲山韶濩音

切響

宋謝靈運傳論五色相宣八音諧暢欲使宮羽相變低昂互節若前有浮聲後須切响一簡之內音韻盡殊兩句之中輕重悉異妙達此旨始可以言文矣

水樂

元結款乃曲序大厓初結為道州刺史以軍事詣都使還州逢春水舟行不進作款乃曲令舟子唱之以取適于道路云

東野窮愁死不休高天厚地一詩四江山萬古潮陽筆合在

元龍百尺樓

窮愁

六一詩話孟郊賈島以詩窮至死而平生尤喜窮苦之句孟有移居詩云借車載家具家具少于車是都無一物耳○隱居詩話孟郊詩鑿鑿窮僻琢削不暇

真苦吟面成其自謂夜吟曉不休苦吟鬼神愁如何不自閑心與身為仇又云東野一不第而有出門即有礙誰謂天地寬若無所容其身者潮陽東坡讀夜讀孟郊詩細字如牛毛孤芳難雜荒穢苦語餘詩駭要當門僧清未足當韓愈○山谷書少陵詩後云子美到夔州後退之自潮州還朝後文章不煩繩削而自合○歸田詩遺山論詩話尊退之而鄙薄東野至矣東坡亦有未足當韓愈之句又云既厭孟郊詩復作孟郊語蓋不為所取也

萬古幽人在澗阿百年孤憤竟如何無人說與天隨子春草

輸贏較幾多

天隨子詩無多藥草在南榮合有新苗次第生稚子不知名品上恐隨春草門輸贏○初白云所見者大亦從翻案出奇

幽人

讀書志陸龜蒙居松江甫里以文章自怡自號江湖散人或號天隨子甫里先生自序云自乾符六年春卧病笠澤遇體不甚羸耗時亦隱几著書詩賦銘記

往往問發不類不次

孤憤

韓非子有說難孤憤篇

謝客風容映古今發源誰似柳州潑朱絃一拂遺音在卻是

當年寂寞心

柳子厚宋之謝靈運○初白云以柳州接康樂千古特識

謝客

詩評謝幼度亡其家以子孫難得送靈運于錢

柳州

劉禹錫柳州文集序貞元中上方向文章昭回

之光下飾萬物天下文士爭執所長與時而奮然如繁星麗天芒紫色正人望而致者五行而已河東柳子厚斯人望而敬者與○白石詩話屈宋之交風出韓柳之文雅

出○魚隱叢話蔡修詩評云子厚詩雄深簡淡迴振流俗至味自高直抱陶謝

窘步相仍死不前唱酬無復見前賢縱橫正有凌雲筆俯仰

隨人亦可憐

初白云公絃孤酌聆者悽然

凌雲

杜甫絕句庾信文章老更成凌雲健筆自縱橫

隨人

黃魯直詩隨人作計終後人又文章最忌隨人後○南溪詩話東坡云詩須有為而作山谷云

詩文惟不造空強作待境而生便自工耳予謂今人之詩惟務應酬皆無謂而強作者無惟其語之不工遺山云縱橫自有凌雲筆俯仰隨人亦可憐知其病者也

奇外無奇更出奇一波纔動萬波隨只知詩到蘇黃盡滄海

橫流卻是誰

一波

白石詩說詩之波瀾開合如江湖中一波未平一波已起變化不可紀極

蘇黃

後村詩話元祐以後詩人迭起不出蘇黃二家陳與義云詩至老杜

極矣蘇黃復振之而正統不墜

曲學虛荒小說欺俳諧怒罵豈詩宜今人含笑古人拙除卻

雅言都不知

俳諧

隋經籍志俳諧文十卷袁淑撰梁有續俳諧文集十卷○案少陵義山俱有俳諧體詩

怒罵

滄浪詩話近代作詩其末流甚者叫噪怒張殊乖忠

厚始以罵詈為詩至此可為一厄○案先生有詩文自警一書又小亭集序云初余學詩以十數條自警毋怨毋懣毋謔毋傲毋虐毋異毋狹計毋煇阿毋附會毋籠絡毋行毋矯飾毋為聖白辨毋為賢聖顛毋為妾婦妬毋為仇敵謗傷毋為蠻俗閑傳毋為替師皮相毋為駮卒醉橫毋為黠兒白捻毋為田舍翁木強毋為法家醜詆毋為牙郎轉販毋為市倡怨思毋為琵琶娘人魂酌詞毋為邸夫子鬼國冊毋為弄沙僧困義學毋為稠梗治禁詞毋為天地一我古今一我毋為薄惡所移毋為正人端士所不道

有情芍藥含春淚無力薔薇臥曉枝拈出退之山石句始知

渠是女郎詩

初白云齊梁陳隋諸名家大抵皆女郎詩不數中唐以後也

有情

中州集王中立傳予嘗從先生學問作詩究竟如何先生舉秦少游春雨詩有情芍藥云云詩非不工若以退之芭蕉葉大梔子肥枝之則春雨為婦人語矣

破卻工夫何至學婦人○歸田詩話遺山論詩有情芍藥云云初不曉所謂後見詩文自警一編所謂有情二句少游春雨詩也非不工巧然以退之山石句觀之渠乃女

也  
耶詩

亂後元都失故基看花詩在只堪悲劉郎也是人間客枉向

春風怨兔葵

元都

劉禹錫集元和十一年自朗州承召至京戲贈看花諸君子詩紫陌紅塵拂面來無人不道看花回元都館裏桃千樹盡是劉郎去後栽再游元都引云余貞

元二十一年為屯田員外時此館未有花是歲出牧連州尋貶朗州司馬居十一年召至京師人人皆言有道士手植仙桃滿觀如紅霞遂有前篇以志一時之事旋又出牧

今十有四年復為主客郎中重游元都感然無復一樹惟兔葵燕麥動搖于春風耳因題二十八字以示後游時大和二年三月詩云百畝庭中半是苦桃花淨盡菜花開種

桃道士今何在前度劉郎今又來

金入洪鑪不厭頻精真那計受纖塵蘇門果有忠臣在肯放

坡詩百態新

初白云蘇門諸君無一人能繼嫡派者才有所限不可強耳

蘇門

復齋漫錄子瞻子由門下客最知名者黃魯直張文潛晁无咎秦少游為四學士無已晚出不及四人之列无咎云當時以子瞻為長公子由為少公無已云

魯直長于詩詞秦晁長于議論文潛云長公波濤萬頃海少公峭拔千尋麓黃君蕭蕭日下鶴陳子峭峭霜中竹秦文蔚麗舒桃李晁論崢嶸走珠玉乃知人才各有所長雖

蘇門不能兼全也

百年纔覺古風迴元祐諸人次第來諱學金陵猶有說竟將

何罪廢歐梅

初白云若就詩論詩半山亦不在歐梅下誰能廢之

諱學

澠水燕談荆公之時學者得出其門以為榮公治經尤尚解字末流務為新奇致成穿鑿朝廷患之詔學者兼用舊傳注不專治新經禁援引字解于是學者

皆變所學至有著書以詆公者又諱稱為公門人張  
芸叟挽詞云今日江湖從學者人人諱道是門生  
為終日喜一日與裴論交及坡公嘆曰汝記我言三十年世上人  
更不道著我也崇寧大觀間海外詩盛行後生不復有言歐公者  
有盛名于時近世少有著者或如毀譽惟陸務觀重之此可為知者道也自世人競宗  
江西已看不入眼况晚唐卑格方錮之時乎少陵尚有竊議妄論者其于宛陵何有

古雅難將子美親精純全失義山真論詩寧下涪翁拜未作

江西社裏人  
初白云涪翁生拘鍾鍊自成一家值得下拜江西派中原無第二手也

古雅  
涪南詩話山谷自謂得法于少陵而不許于東坡子觀之少陵典謨也東坡孟子之流山谷則揚雄法言而已涪翁拜  
風月堂詩話陳無已

晚得詩法于魯直嘗曰吾此一瓣香須為山谷道人燒也  
江西社  
漁隱叢話呂居仁以詩得名自言傳衣于江西嘗作宗派圖自豫章以降列陳師道二十

五人為法嗣謂其源出于豫章也其序略云唐自李杜以後煥耀一世後之言詩者皆莫能及惟豫章自由機杼別成一家云云要之清新奇巧是其所長若抑揚反復盡兼眾體則非也所列二十五人為所稱道者數人餘亦濫登其列此圖之選擇不精議論不公故辨之○涪南詩話古之詩雖趣尚不同製作不一要皆出于自得辭達理順皆足名家何嘗有以句法繩人者魯直開口論句法此便是不及古人處而門徒親黨以衣鉢相傳豈詩之真理也哉

池塘春草謝家春萬古千秋五字新傳語閉門陳正字可憐

無補費精神  
初白云罵劉后山餘不待言

池塘

世說謝靈運嘗思詩不成忽夢惠連即得池塘生春草之句云此語似有神助○石林詩話池塘二語人多不解此句爲工蓋欲以奇求之耳此語之工正在無意中猝然與景物遇故非常情之閉門○宋文苑傳陳師道字無已爲祕書省正字所能到而思苦言艱者往往不悟歸擁被臥而思之呻吟如病者或累日方起故曰閉門覓句陳無已可憐

半山詩句

撼樹蚍蜉自覺狂書生技癢愛論量老來留得詩千首卻被

何人校短長

初白云文人習氣好評量古人而又恐人議已先生亦復不免

撼樹

韓愈調張籍詩李杜文章在光燭萬丈長不知群兒疑那用故謗傷蚍蜉撼大樹可笑不自量

文湖州草蟲爲劉使君賦

造物無心筆有神翩翩飛動百年新蟲魚瑣細君休笑學會

屠龍老卻人

京都元夕

絃服華妝著處逢六街燈火鬧兒童長衫我亦何爲者也在  
游人笑語中

西園

百草千花雨氣新  
今朝陌上有游塵  
皇州春色濃於酒  
醉殺西園歌舞人

藍采和像

長板高歌本不狂  
兒曹自爲百錢忙  
幾時逢著藍衫老  
同向春風舞一場

鴛鴦扇頭

雙宿雙飛百自由  
人間無物比風流  
若教解語終須問  
有底愁來也白頭

杏花雜詩十三首

杏花牆外一枝橫  
半面宮妝出曉晴  
看盡春風不迴首  
寶兒元是太愁生

露華浥浥泛晴光  
睡足東風倚綠窗  
試遣紅妝映銀燭  
湘桃爭合併仙郎

嫋嫋纖條映酒船  
綠嬌紅小不勝憐  
長年自笑情緣在  
猶要春風慰眼前

暖日園林可散愁  
每逢花處儘遲留  
青旗知是誰家酒  
一片春風出樹頭

紛紛紅紫不勝稠  
爭得春光競出頭  
卻是梨花高一著  
隨宜梳洗儘風流

露浥清華粉自添  
隔溪遙見玉簾苫  
眼看桃李飄零盡  
更揀繁枝插帽簷

小橋南北夢幽尋  
殘醉膏騰不易禁  
一樹杏花春寂寞  
惡風吹折五更心

西山漠漠有無中  
幾日園林幾樹紅  
燕子啣將春色去  
錯教人恨五更風

錯教

初月云  
王建句

屈指殘春有別期  
春風爭忍片紅飛  
若爲釀得千日酒  
醉著東君不放歸

楚客離魂不易招  
野春平碧水迢迢  
垂楊也被多情惱  
瘦損春風十萬條

小雨班班曉未勻  
煙光水色畫難真  
西園春物知多少  
一樹垂楊惱殺人

魏紫姚黃有重名  
洛陽車馬鬧清明  
吹殘桃李風纔定  
可是東君別有情

紅妝翠蓋惜風流  
春動香生不自由  
莫向芸齋厭閑冷  
小詩

供作錦纏頭

韓偓燕三清之瑞露春動七情阻五色之靈芝香生九殿

### 出京

巫峽歸雲底處尋  
高城渺渺暮煙沉  
春風不剪垂楊斷  
繫盡行人北望心

### 惠崇蘆雁三首

圖畫見聞志釋惠崇建陽人工畫鵝雁鶩尤工小景善爲寒汀遠渚瀟灑虛曠之象人所難到○秋澗集惠

崇蘆雁圖詩雪灘風竹映寒塘水宿雲飛未易雙又似驚鷺沙清煖翠紅相倚睡春江

寒沙折葦靜相依  
故國春風早晚歸  
意外羈棲誰畫得  
羽毛單薄稻梁微

雁奴辛苦候寒更  
夢破黃蘆雪打聲  
休道畫工心獨苦  
題詩人也白頭生

江湖牢落太愁人  
同是天涯萬里身  
不似畫屏金孔雀  
離離花影淡生春

蚤起

北舍南鄰獨樂聲  
袂衣晨起覺秋清  
豆田欲熟朝朝雨  
喚殺雙鳩不肯晴

書生

書生千古一藟腸  
蓋世功名不自償  
更笑登封武明府  
兩孟白粥半生忙

銅雀臺瓦硯

文房四譜古瓦研出相州魏銅雀臺軍人掘土往往得之貯水數日不滲○道山清話世傳銅雀瓦驗之有三錫花鮮疵雷斧是也然皆風雨雕鏤不可得而偽

愛惜鉛花洗又看  
畫欄桂樹雨聲寒  
千年不作鴛鴦去  
喚得書生笑老瞞

鴛鴦

溫庭筠詩野土千年怨不平至今燒作鴛鴦瓦

步虛詞二首

後二首三  
鄉時作

闔苑仙人白錦袍海山宮闕醉蟠桃三更月底鸞聲急萬里  
風頭鶴背高

萬神朝罷出通明和氣歡聲滿玉京見說人間有新異綠章  
封事謝昇平

通明

王欽若翊聖保德傳建隆初鳳翔懿民張守真一日朝禮玉皇大殿見其額曰通明殿不曉其旨真君曰上帝在無上天為諸天之尊常升金殿光明通澈

無所不照故

綠章

李賀綠章封事詩為通明殿為吳道士夜醮作

琪樹明霞碧落宮歌音嫋嫋度冷風人間聽得霓裳慣猶恐  
鈞天是夢中

拙庵為溫甫賦

歸潛志移刺都尉賈奴字溫甫契丹世襲猛安也讀史書慷慨尚無義喜交士大夫視女直同列諸人奴隸也

常為宣撫使便宜鄧瑑間以事杖殺經歷官坐廢後為虎賁都尉提兵赴關中復由商南全軍而回病死自號拙軒趙開閑為賦之諸公皆有詩正大初先子令葉余往省會溫甫屈余為拙軒銘先子亦有詩

毫端棘末幾人爭愚智相懸賦分平畢竟世間誰是巧鬢毛

愁白可憐生

毫端

唐勒小言賦館  
蠅鬚毫端

風雨停舟圖

老木高風作意狂  
青山和雨入微茫  
畫圖喚起扁舟夢  
一夜江聲撼客牀

納涼張氏莊二首

見五卷  
驅猪行

小橋深竹午風便  
一道垂楊帶亂蟬  
山下行人遮日去  
卻從茅屋問瓜田

樹陰環合水縈回  
樹下行人坐綠苔  
絕似叢蒙山下路  
眼中

唯欠繫舟鬼

叢蒙繫舟皆鄉中山  
鄉人謂之繫舟鬼

繫舟鬼

靈記繫舟山上有銅鑲船軸  
猶在昔帝堯遭水繫舟于此

送窮

十二卷  
又有詩

日吉時良利動遷可能顏巷卜終焉主人不倦奴星倦辛苦  
年年縛草船

日吉奴星草船

竝見韓愈  
送窮文

楊柳

楊柳青青溝水流鶯兒調舌弄嬌柔桃花記得題詩客斜倚  
春風笑不休

梁縣道中

地志南京路  
汝州梁縣

青山簇簇樹重重人在春雲浩蕩中也是杏花無意見一枝  
臨水臥殘紅

自題寫真二首

又二卷劉詩之寫真  
詩又本集寫真贊

山林日月老潛夫骨入窮泉未擬枯幽澗有冰含太古無人

和玉試洪鑪

孫綽雖沒泉  
壤死且不朽

窮泉

晉孫綽傳綽上疏曰使丹誠上達退受刑誅雖沒泉壤尸且不朽

玉鑪

韓偓和孫舍人詩熾炭一爐真玉性濃霜千澗老松心又此翁詩金

勁任從千口鑠玉寒會試幾爐烘又聞復官詩燒玉漫勞會歷試鍊金定為欠局防

一派春煙澹不收漁家已許借扁舟山林且漫蹉跎去莫問人間第幾流

再題

高談世事真何者多竊時名亦偶然山鹿野麋君自看擬從何地著貂蟬

吳子英家靈照圖二首

子英見八卷東橋注○傳燈錄襄州居士龐藹一女名靈照龐公將入滅令女靈照

出視日蚤晚及午以報女遙報曰日已中矣而有蝕也居士出戶觀次靈照即登父坐合掌坐亡居士笑曰我女機鋒捷矣

船入西江萬有空漚離活計百錢功阿靈了卻無生話想得蕭然似卷中

抱犢山高記洛川寸腸西去似繩牽而今卻羨龐家好兒女

生來只眼前

時女駭在盧氏約歸寧未至

劉鄧州家聚鴨圖

沙浦空明洲景微  
枯荷折葦淡相依  
若爲化作江鷗去  
拍拍隨君貼水飛

戊子正月晦日內鄉西城遊眺

雄蜂雌蝶爲花狂  
陌上遊人醉幾場  
前日少年今白髮  
卻來閑處看春忙

長壽山居元夕

微茫燈火共荒邨  
黃葉漫山雪擁門  
三十九年何限事  
只留孤影伴黃昏

聞仲澤丁內艱

見八卷別詩

升堂未幾計音聞  
凶服衰羸日念君  
昨夜東南雷雨惡  
遙知

號哭遶新墳

贈眼醫武濟川

世事紛紛昧是非不應刮膜在金鉗知君聖處工夫到且道  
心盲作麼醫

賦粹中師竹拂子

即本庵見三十七卷集序○中州集秦略同希顏俗之賦集真竹拂子詩云貧个龜毛抵死難直教擊碎

釣魚竿世人不用生分別信手拈來總一般

了卻香嚴一擊緣滿梳華髮伴談元誰知抹月披風意已具

鈴鎚未落前

抹披

傳燈錄薄披明月細抹清風

鈴鎚

明道編或行磬坐喝豎拂拈鎚

題伊陽楊氏戲虎圖

地志南京路嵩州伊陽縣

大班笑口侵耳小班蓄縮如乞憐戲闌真成兩肋敵發機

誰在卞莊前

王子端內翰山水同屏山賦二詩

子端見五卷注屏山見八卷詩○中州集李屏山有

子端山水同啓之賦詩遼鶴歸來萬事空人間無地著詩翁只留海鶴樓中景長在經營慘淡中

鄭虔三絕舊知名付與時人分重輕遼海東南天一柱胸中誰比玉崢嶸

萬里承平一夢間風流人物與江山眼明今日題詩處卻見

明昌玉笋班

玉笋班

唐李宗閔傳爲中書舍人典貢舉所取多知名士若唐冲薛崖袁都等世謂之玉笋班

右司正之家渭川千畝圖二首

中州集王特起傳字正之代州崞縣人智識精深好學善論議

音樂技藝無所不能長於辭賦出入經史摘其英華以爲句讀如天造神出至得意不減郭橐在張代州門下與屏山爲忘年友泰和三年進士甲科調真定府錄事參軍有惠政民立碑頌其遺愛改台沁源又遷司竹監使朝議欲以館職召試會卒遊龍德宮聯句云棘猴未窮巧槐蟻或失王賦雙峰競秀云龍頭巖變角馳背堆寒峯華山云三峰盤地軸一水落天紳造化無遺巧丹青總失真閑閑公屢哦此詩以爲妙○又楊雄有懷王正之詩湛然集有和王正之韻詩淦水集有和王正之寄遠詩○本集三十一卷圖明表三十四卷題名記

官街塵土霧中天入眼荒寒一灑然大似終南山下看北風  
和雪捲蒼煙

老眼蕭郎筆有神巖姿洲景盡天真情知一段幽閒趣不必  
清談著晉人

蕭郎

白居易畫竹歌植物之中竹難寫古今雖畫無似者蕭郎下筆獨逼真丹青以來惟一人

同希顏欽叔玉華谷分韻得軍華二字二首

中州集雷淵玉華山中同

裕之分韻送欽叔得歸字詩云洗耳潁川水療饑西山薇山川得佳客草木生光輝末路風教薄此道日已微相期千載事非君誰與歸○又李欽叔玉華谷同希顏裕之分韻得秋字玉龍落峽噴飛流空翠霏霏晚不收歎胸山堂一壺酒暮涼閒對兩峯秋

竝山一逕入秋雲草樹低迷劣可分開道無煩謝康樂挽彊

須得李將軍

時有虎害故戲云

深山水木湛清華與到窮探亦未涯轉石猶能起雷雨題詩

自合動煙霞

轉石當日事

同希顏欽叔玉華谷還會善寺卽事二首

新樂府少室玉華谷月夕與希

顏欽叔飲醉中賦水調歌頭詞山家釀初熟取醉不論錢清溪留飲三日魚鳥亦欣然見說玉華詩老袖有忘憂萱草牛背穩于船鐵笛久埋沒雅曲竟誰傳坐蒼苔欹亂石耿無眠長松夜半悲嘯聲鶴下遶天天上金堂玉室地下石城瓊壁別有一山川把酒問明月今夕是何年

高風捲盡四山雲  
泉石煙霞得細分  
大是山靈設清供  
惜無佳句答殷勤

詩翁徹骨愛煙霞  
別似劉君住玉華  
鐵笛不曾從二草  
頭巾

久已挂三花

趙隱之子端同年進士令任城爲猾吏所誣遂隱居今年八十餘自言胎仙已成不久去世云

劉君鐵笛

風月堂詩話劉伯壽洛陽九老之一也築室崧山玉華峰下號玉華庵主有妾名萱草芳草皆秀麗善音律伯壽出入乘牛吹鐵笛二草以新

笛和之聲滿山谷出門不言所之牛行卽行牛止卽止其止也必命萱草盡醉而歸崧前以爲地仙 二花 蘇軾三朶花詩序房州通判許安世以書遺余言吾州有異人常戴三朶花莫知姓名郡人因以名之

從鄧州相公覓酒時在鎮平

鎮平見九卷感懷詩

寒日山城雪四圍  
空齋孤坐意多違  
江州未覺風流減  
可使

陶潛望白衣

鎮平寄姪孫伯安筆

一卷示詩

隆顙犀角掌中珠不見經年日念渠領取阿翁郎管筆試教學寫問安書

黃筌龜藏六圖為張左丞賦

益州名畫兼黃筌成都人幼有畫性少負奇能刁處士入蜀授之竹石花

雀又學孫位龍水松石李昇山水竹樹曲盡其妙○雜阿舍經有龜被野干所包藏六而不出野干怒而捨去佛告諸比丘當如龜藏六自藏六根魔不得便○法句譬喻經題從河出水狗欲咬龜龜縮頭尾四脚藏于甲中遂不敢咬沙門說偈云藏六如龜防意如城慧與魔戰勝則無患○宣和畫譜御府所藏黃筌圖三百四十九有寫生龜圖○張左丞即信甫詳二卷案信甫傳哀宗即位遷左丞後二年致政卒先生詩語殆有望于左丞耶

無心舒卷付皇天不幸剝腸亦偶然世上疑謀待君決可能藏六便安全

鎮平書事

勸農冠蓋已歸休了卻逋懸百不憂可是諸人哀老子半窗

紅日擁黃紬

黃紬

蘇軾詩看君擁黃紬高卧放早衙

自鎮平暫往秋林道中寄家

風雨塵埃了半生西山歸去眼增明浮雲夫壻今如此莫遣

迎門有嘆聲

超化

中州集王庭筠超化寺詩隔竹微聞鐘磬音墻頭脩綠冷陰陰山迎初日花枝靚寺裏清潭瑤影深吾道蕭條三已仕此行衰病獨登臨

催得忽忽去暗記風煙擬夢尋○又史士舉超化詩石根寒溜迸珠璣尋丈驚看雪浪飛我是玉川煙水客暫來盤礴亦忘歸○新樂府超化蘇軾軒得欽叔書洞仙歌詞青錢白壁自買愁腸繞更恨權狂負年少記陽關圖上尊酒留連見女泪輸與閒人坐釣茂陵多病後嫵盡琴心無復求鳳與同調似清風古殿風動幡搖晴晝永惟有龕燈靜照看胡蝶飛來澹無情問牆角荻莢爲誰凝笑○案寰宇訪碑錄有元道山題超化寺詩大口正書至治二年二月立在河南密縣未知爲元世何人所刻或卽此詩否

秋風嫋嫋入僧窗盡得諸山草木香卻恨大梁三日醉不來

超化作重陽

又云擬借扁舟弄秋水自嫌塵土泥沙鷗餘不記

山居二首

斜陽高樹挂晴虹  
肅肅微涼雨氣中  
一道鷺鷥花不斷  
蜜香吹滿馬頭風

詩腸搜苦怯茶甌  
信手拈書卻枕頭  
簷溜滴殘山院靜  
碧花

紅穗媚涼秋

寄女嚴三首

遣山臺銘女五人次嚴女冠詔爲官教號潛溪真隱

鶴崖魚窟路間關  
旬月無由一往還  
寒食歸寧見鄰女  
舉家

迴首望西山

鶴崖魚窟在內鄉往盧氏道中

歸寧

案前靈照園生時女嚴在盧氏約歸寧未至

添丁學語巧於絃  
詩句無人爲口傳  
竹馬幾時迎阿姊  
五更

教誦木蘭篇

木蘭篇

案十二卷卽事云阿  
茶能誦木蘭行卽此

眼前兒女最關情  
不見經年百感并  
聞道全家解禪理  
擬從香火問無生

自鄧州幕府暫歸秋林

升斗微官不療饑  
中林春雨蕨芽肥  
歸來應被青山笑  
可惜緇塵染素衣

無題二首

七十鴛鴦五十絃  
酒薰花柳動春煙  
人間只道黃金貴  
不問天公買少年

春風也解惜多才  
嫁與桃花不用媒  
死恨天台老劉阮  
人間何戀卻歸來

劉阮

南嶽詩話元微之題劉阮入山詩云芙蓉脂肉綠雲鬟  
畫樓臺青黛山千樹桃花萬年藥不知何事憶人間  
後元遺山云死恨天台老劉阮人間何戀卻歸來

來正祖  
此意

題省掾劉德潤家驂鸞圖并爲同舍郎劉長卿記異

劉在方城先有碧蕭之遇如芙蓉城事云

德潤又見三十卷孫君碑

續夷堅志關中二變云劉潤之說或是

千劫情緣萬古期樓中蕭史姓名非洞天花落秋雲冷腸斷  
青鸞獨自飛

### 希顏挽詩五首

官銜寥落在銘旌才命寧論重與輕不作漢家賢傳去空勞

明主識蕭生

孟馬漢漢旌紀寂寞魏書傳逸傳中語

蕭生

漢蕭望之傳宣帝自在民間聞望之名曰此東海蕭生耶

山立揚休七尺身紫髯落落照青春從教不入麒麟畫猶是

中朝第一人

人間無路問天公自古才難更厄窮日月不爲千載計江山  
長惜萬夫雄

萬古文章有正傳驂騑爭道望君先傷心一入重泉後再得  
斯人又幾年

一世龍門屬李膺待君提拂遂騰升千年荆棘龜趺在會有  
人尋下馬陵

下馬陵

國史補董仲舒墓門人過  
皆下馬故謂之下馬陵

出鄧州

本無奇骨負功名取次誰教髀肉生未到白頭能幾日六年  
留滯鄧州城

過希顏故居四首

缺壺聲裏短歌行星斗闌干醉膽橫虎視鷹揚何處在道邊

孤豕可憐生

鶴蓋成陰著處同一時人物酒杯中臣門如市心如水世俗

論量恐未公

鶴蓋

歸潛志正大間雷希顏李欽叔俱在翰苑王鶚百一以新進狀元亦入院爲應奉然其趨向各不同故當時館中有云凡在院諸公有侯門戚里者有秦樓謝館者有田夫野老者侯門戚里謂雷交權要也秦樓謝館謂李狎歌酒也田夫野老謂王爲其鄉人通請託也

暮去朝來萬化途飛揚跋扈亦區區劇談不盡平生意能有精微入夢無

把臂論交分最深三夫成虎古猶今百年唯有區區在地下纔應識此心

雜著九首

萬期流轉不須更物物觀來定有無玉席紙衣同一盡枉將白骨計榮枯

玉席

唐中宗斷奇巧制云蕭官家柱宅與國之清獻玉席珠衣乃危邦之弊化

紙衣

通鑑後周紀顯德元年帝崩成晉王曰昔晉西征見唐十八陵無不

發掘者此無他惟多藏金玉故也我死當衣以紙衣歟以玉棺速營葬勿久留宮中刻石陵前云周天子好儉約遺令以紙衣玉棺嗣天子不敢違也汝或吾違吾不福汝

鳬短何如鶴有餘非魚誰謂子知魚一枝莫作鵲鵲看水擊

三千不羨渠

太虛空裏一遊塵造物雖工未易貧臧獲古來多鼎食可能

夷叔是饑人

臧獲

方言荆淮海岱之間罵奴曰臧罵婢曰獲齊之比鄰燕之北郊凡民男而婿婢謂之臧女而婦奴謂之獲亡奴謂之臧亡婢謂之獲

青蓋朝來帝座新豈知衛瑾是忠臣洛陽荆棘千年後愁絕

銅駝陌上人

衛瑾

晉本傳武帝會宴陵雲臺瑾跪帝牀前欲言而止者三以手撫牀曰此座可惜帝謬曰公真大醉耶

六國孱王走下風神人鞭血海波紅無端一片云亭石殺盡

蒼生有底功

屏王

國策晉王  
屏王也

天上河源地上流黃金浮世等閒休埋愁不著重泉底儘向

人間種白頭

埋愁

仲長統述志詩寄  
愁天上埋憂地下

泗水龍歸海縣空朱三王八竟言功圍棋局上猪奴戲可是

乾坤鬪兩雄

朱三

五代梁太祖傳太祖主劉崇家不作業數加害黃崇母獨憐之曰朱三非常人  
可善遇之及黃迎母于崇家母曰朱三落魄無行何乃至此與崇母俱歎歸

王八

唐王建傳少無賴屠牛盜驢  
販鹽為姦里人呼為王八

猪奴戲

晉陶侃傳樛滿  
者牧猪奴戲

昨日東周今日秦咸陽煙火洛陽塵百年蟻穴蜂衙裏笑殺

崑崙頂上人

半紙虛名百戰身轉頭高塚臥麒麟山間曾見漁樵說辛苦

凌煙閣上人

戚夫人

鴻鵠冥冥四海飛戚夫人舞淚霑衣無端恨殺商山老剛出

山來管是非

鴻鵠

漢張良傳戚夫人泣上曰爲我楚舞我爲若楚歌歌曰鴻鵠高飛一舉千里羽翼以就橫絕四海

題山谷小豔詩

法秀無端會熱謾笑談真作勸搖看只消一句脩脩利李下

何妨也整冠

李下

古詩君子防未然不處嫌疑間瓜田不納履李下不整冠

家山歸夢圖

中州集開開繁州山圖詩見後十一卷○又楊之美李平甫爲裕之畫繁州山圖開公有詩某亦繼作云名利走

朝市山居良獨難况復山中人讀書不求官東崑有佳致書室方丈寬役美元夫子學道如觀濶孔孟澤有餘曾顏膏未殘向來種德深直與山根蟠之子起其門孤鳳驚羽翰計偕聊爾爾平步青雲瑞竭來遊京師士子拭目觀禮部天下士文盟今歟韓一見折行輩殆如平生歡舞雩春風期若曾點冠五言造平淡許上蘇州境表膏讀子詩一倡而三歎世人非無才多爲才所誤高者足取詞下者或辛酸吾子忠厚姿不受庸俗浸睛

雲意自高淵水聲無滿他日傳吾道政要才行完會使茲山名與子俱不  
刊○又趙宜之題裕之家山圖詩繫丹盤盤連石嶺牧馬澄澄倒山影山  
光水氣相混淆中有元家舊廬井欄門一開豺虎場鴛言投迹嵩之陽青  
山偃蹇不可將十年竟墮兵塵黃東轍風物知猶在說與寄庵神已會一  
揮淡墨能似之清輝遠奇形骸外元家故山香與鄰夢見不如畫圖真箇  
會行處助經眼未得歸時亦可人○又劉昂霄題裕之家山圖詩萬里神  
州劫火餘九原夷甫有餘辜作詩  
為報元夫子真倚家山在畫圖

別卻并州已六年眼中歸路直于弦春晴門巷桑榆綠猶記  
騎驢掠社錢

繫舟南北暮雲平落日滹河一線明萬里秋風吹布袖清暉  
亭上倚新晴

游騎北來塵滿城月明空照漢家營卷中正有家山在一片  
傷心畫不成

#### 四皓圖

身墮安車厚幣中白頭塵土流西風當時且不山間老羽翼

區區有底功

雜著

老優慣著沐猴冠卻笑旁人被眼謾造物若留殘喘在我儂  
試舞你儂看

儂

六書故吳人謂人爲儂卽人聲之轉

你

廣韵泥上聲通雅爾汝若乃一聲之轉

元遺山詩集箋注卷十二終

元遺山詩集箋注卷十二

施國祁北研箋  
烏程

蔣炳枕山校

七言絕句

俳體雪香亭雜詠十五首

亭在故汴宮仁安殿西。輟耕錄廉訪使楊文憲公與字煥然乾州奉天人嘗

作汴故宮記云己亥春三月按部至于汴汴長史宣于廢宮之長生殿懼後世無以考爲纂其大槩云皇城南外門曰南薰南城之北新成門曰豐宜橋曰龍津橋北曰丹鳳而其門三丹鳳北曰州橋橋少北曰文武樓連御路而北橫街也東曰太廟西曰郊社正北曰承天門而其門五雙闕前引東曰登聞檢院西曰登聞鼓院檢院之東曰左掖門門之南曰待漏院鼓院之西曰右掖門門之南曰都堂承天之北曰大慶門而日精門左昇平門居其東月華門右昇平門居其西正殿曰大慶殿東廡曰嘉福樓西廡曰嘉瑞樓大慶之後曰德儀殿德儀之東曰左昇龍門西曰右昇龍門正門曰隆德曰蕭牆曰丹墀曰隆德殿隆德之左曰東上閣門右曰西上閣門皆南嚮東西二樓鐘鼓之所在鼓在東鐘在西隆德之次曰仁安門仁安殿東則內侍局內侍之東曰近侍局近侍之東曰嚴祿門宮中則曰撤台門少南曰東樓卽授除樓也西曰西樓仁安之次曰純和殿正寢也純和西曰雪香亭雪香之北后妃位也有樓樓西曰瓊香亭亭西曰涼位有樓樓北少西曰玉清殿純和之次曰寧福殿寧福之後曰苑門由苑門

而北曰仁智殿有二大石左曰敷錫神運萬歲峯右曰玉京獨秀太平殿  
殿曰山莊莊之西南曰翠微閣苑門東曰仙韶院院北曰湧翠峯峯之洞  
曰大滌湧翠東長生殿殿東曰湧金殿湧金之東曰蓬萊殿長生西曰浮  
玉殿浮玉之西曰瀛洲殿長生之南曰閱武殿閱武南曰內藏庫由殿祇  
門東曰尚食局尚食東曰宣徽院宣徽北曰御藥院御藥北曰右藏庫右  
藏之東曰左藏宣徽東曰點檢司點檢北曰祕書監祕書北曰學士院學  
士之北曰諫院諫院之北曰武器署點檢之南曰儀鸞局儀鸞之南曰尚  
輦局宣徽之南曰拱衛司拱衛之南曰尚衣局尚衣之南曰繫禧門繫禧  
南曰安泰門安泰西與左升龍門直東則壽聖宮兩宮太后位本明俊殿  
試進士之所宮北曰徽音殿徽音之北曰燕壽殿燕壽殿垣後少西曰震  
肅衛司東曰中衛尉司儀鸞之東曰小東華門更漏在焉中衛尉司東曰  
祇肅門祇肅門東少南曰將軍司徽音壽聖之東曰太后苑苑之殿曰慶  
春慶春與燕壽並小東華門正東華門對東華門內正北尚廐局尚廐西北  
曰錦武殿左掖門正北尚食局局南曰宮苑司宮苑司西北曰尚鑾局湯  
藥局侍儀司少西曰符寶局器物局西則掖台門嘉瑞樓西曰三廟正殿  
曰德昌東曰文昭殿西曰光興殿並南擢德昌之後宜宗廟也宮西門曰  
西華與東華直其北門口安貞二大石外凡花石臺榭池亭之細並不錄  
觀其制度簡素比土階茅茨則過矣視漢之所謂千門萬戶珠璧華麗之  
室則無有也然後之人因其制度而損益之以求其稱斯可矣公又有錄  
汴梁宮人語五言絕句一十九首題一時之所奇興亦不無有傷感之意  
今併附于此詩曰一入深宮裏經今十五年長因批帖子呼到御牀前  
歲逢元夜金蛾鬧簇巾見人心自怯終是女兒身殿前輪直罷偷去賭金  
釵怕見黃昏日殷勤上玉階翠翹珠掘背小殿夜藏鈎幕地羊車至低頭  
笑不休內府頒金帛教酹賀節疑兩宮新有旨先與問孤寒人間多聚粟

不到九重天長被黃衫吏花廳月賜錢仁聖生辰節首王進玉后壽期  
壽表畱待北還時邊奏行臺急東華夜啟封內人健步聲不候景陽鐘  
燭雙雙引珠簾一一開釐前角下拜歡飲辟寒盃聖躬香閣內只道下朝  
遲扶杖嬌無力紅綃貼玉肌今日天顏喜東朝內宴開外邊農事動詔遣  
教坊回駕前雙白鶴口日候朝回自送鑾輿去經今更不來院覺文書靜  
相將立夕陽傷心寧福位無復夜熏香二后雖陽去潛身泣到明却回誰  
敢問校似有心情爲道圍城久放僉闕稿軍入春渾斷絕饑苦不堪聞監  
國推梁邱初頭靜不知但疑將外笑人有看宮時別殿弓刀响會皇接鄭  
王尚愁宮正怒含淚強添妝一向傳宣喚誰知不復還來時舊鐵綬記得  
在窗間北去遷沙漠誠心畏從行不如當日死頭白若爲生。案宮人詩  
十九首可考者仁聖生辰宣宗后王氏也鑾輿去者哀宗東狩歸德也寧  
福位有都監同監貞祐二年所設梁邱衛紹王子梁王從恪也鄭王輝立  
也二后雖陽去者記哀宗遣近侍四喜泰迎兩宮不得出京事自輟耕錄  
並引楊氏陳氏所記宋金宮殿日內失載金字遂令張昱宮詞序以爲宋  
宮人語何怪乎升庵并以雪香  
亭十五首爲宋徽宗時事哉

滄海橫流萬國魚茫茫神理竟何如六經管得書生下關劍  
長槍不信渠

洛陽城闕變灰煙暮號朝虞只眼前爲向杏梁雙燕道營巢  
何處過明年

落日青山一片愁大河東注不還流若爲長得熙春在時上

### 高層望宋州

宋州

初白評云此十五首當是癸巳春未出汴京以前作時哀宗尚在歸德故第三首時上高城望宋州一句乃十五首詩眼也

醇和旁近洞房環碧瓦參差竹樹閑批奏內人輪上直去年

名姓在窗間

醇和殿名

天上三郎玉不如手中白雨趁花奴御屏零落宣和筆畱得

### 華清按樂圖

按樂圖

唐王維傳維思入神宮有以按樂圖示者無題注維徐云此霓裳第三疊最初拍也客未然引工按曲乃信

詩仙詩鬼不謾欺時事先教夢裏知禁苑又經人物散荒涼

臺榭水流遲

十年前商帥國器方城夢中得後二句爲言如此

金縷歌詞金曲卮百年人事鬢成絲重來未必春風在更爲

梨花住少時

重來

初白云若是金亡後軍過汴京不應作如許語

楊柳隨風散綠絲桃花臨水弄妍姿無端種下青青竹恰到湘君淚盡時

琵琶心事曲中論曾笑明妃負漢恩明日天山山下路不須回首望都門

漢恩

歸潛志末帝寶符李氏國亡從太皇太后北遷至宣德州摩訶院李氏自入院止癢處沸殿中作為廢施數合當同后妃赴龍庭將發下佛像前自縊死且自書門紙曰寶符御侍此處身故凡施廢施幾何較之后妃輩失節者何啻霄壤甲午歲予家武川觀其遺跡案兩宮北遷在四月後寶符殉節又不知何時還山安得知之不過預料其如此耳

爐薰浥浥帶輕陰翠竹高梧水殿深去去氈車雪三尺畫羅

休縷麝香金

泥金色如麝香宮中所尚

麝香金

藝林伐山宋徽宗宮人多以麝香色縷金羅為衣裙元裕之詩北去穹廬千萬里畫羅休縷麝香金案句與此不同誤

羅綺深宮二十年更持桃李向誰妍人生只合梁園死金水

# 河頭好墓田

金水河

玉海金水河本京索水渠自禁陽黃堆山其源曰祝龍泉過中年名曰金水建隆三年引灌皇城歷後苑內庭池沼。地志南京路開封府祥符縣

有金水河。范成大金水河詩注云在舊封邱門外。蔣平仲山房隨筆金國南遷浸弱不支又遷睢陽某后不肯播遷寧死于汴元遠山有詩羅綺深宮云云。錢西樵評云人生只合揚州死禪智山光好墓田遺山本之此張翥詩也下句妙在山光二字金水河頭則無味矣

苦才多思是春風偏近騷人悵望中啼盡杜鵑枝上血海棠  
明日更應紅

暖日晴雲錦樹新風吹雨打旋成塵宮園深閉無人到自在  
流鶯哭暮春

萬戶千門盡有名眼中歷歷記經行賦家正有蕪城筆一段  
傷心畫不成

暮雲樓閣古今情地老天荒恨未平白髮羸臣幾人在就中  
愁殺庾蘭成

蘭成

案庾信小字蘭成先生殆自謂也

春夕

數枝殘雪梅仍在  
幾日東風柳已嬌  
春酒價高無可典  
小紅燈影莫相撩

梅花

一樹寒梅古寺邊  
荒山草木動春妍  
東家賴有詩人在  
照影橫枝莫自憐

溪上

短布單衣一幅巾  
暫來閑處避紅塵  
低昂自看水中影  
好箇山間林下人

息軒楊祕監雪行圖

長路單衣怨僕僮  
無人說向息軒翁  
長安多少貂裘客  
偏畫

書生著雪中

楊煥然生子四首

本集廿二卷廣訪碑銘子男四人保煥萬駒嵩山  
縱山皆早夭駒郎者十二以羸疾至于不幸君喪  
之靈然有童鳥之感此  
子殆即萬駒抑嵩縱耶

掌上明珠慰老懷  
愁顏我亦爲君開  
異時載酒揚雄宅  
知有迎門竹馬來

人家歡喜是生兒  
巷語街談總入詩  
我欲去爲湯餅客  
買羊沽酒約何時

半生辛苦坐耽書  
我笑先生老更迂  
生子但持門戶了  
元談何必似童烏

阿麟學語語牙牙  
七歲元郎髻已丫  
更醉使君湯餅局  
兒童

他日記通家

阿麟張君  
美兒子

君美

即張徵見廣訪碑及寄耶律  
書與三卷送往南中不同

記夢

天上材官老不材從教兀兀走塵埃夢中望拜通明殿曾見

金書兩字來

戊子七月二十四日內鄉往盧氏宿走馬平夜夢拜天帝像遂觀法駕導引畫前負鸞三人中有金書小字題裕之者夢中不自知其爲

也子

啟母石

中州集盧淵啟母石同裕之賦云千古崩崖一罅開強將神怪附郊禰無情頑石猶貽謫貝錦徒爲老伯哀

書載塗山世共知誰傳頑石使人疑可憐少室老突兀也被人呼作阿姨

雜著四首

白髮劉郎老更癡人間那有後天期茂陵石馬專相待種下蟠桃屬阿誰

白髮中官解道詩殷勤仍爲惜花枝雪香亭上清明宴記得君王去歲時

六朝瓊樹掌中春  
迴首胡妝一面新  
生羨石家金谷裏  
千年獨有墜樓人

燕語鶯啼百囀新  
長廊寂寂不逢人  
東君去作誰家客  
花柳無情各自春

內鄉雜詩

行吟溪北復溪南  
風日烘人酒易酣  
無限春愁與誰語  
梅花嬌小杏花慙

眉二首

平詞作水

香墨燒殘冰麝塵  
內家新樣入輕勻  
郭熙只爲吳山老  
爭信窗間有小顰

小顰

蘇軾詩游人指點小顰處中有漁陽胡馬嘶

石綠香煤淺淡間  
多情長帶楚梅酸  
小詩擬寫春愁樣  
憶著

分明下筆難

送窮

董道廣川書跋晝者陳維岳作送窮圖唐僖宗咸平二年七月盡其晝窮女形露浥溪作跣跣束易人立曳轆船行纔引紗靴驅擊怪雙翼以絳纒薦之麟蒲周遍室居開門送之爲富女作葵嫗像裁槻爲衣鏤木爲質載之鱣艦飾以纓絡主人當戶反導欲行引階升堂拜獻惟謹乃知此在唐爲盛禮至以圖象見之

煎餅虛拋塼撒堆滿城都道送窮迴不如畱取窮新婦貴女何曾喚得來

三鄉時作

山林鐘鼎不相兼說著浮名夢亦嫌菽水盡歡吾豈敢老親自愛薺羹甜

出都

春閨斜月曉聞鶯信馬都門半醉醒官柳青青莫回首短長亭是斷腸亭

癸巳五月三日北渡三首

道旁僵臥滿羃囚過去旃車似水流紅粉哭隨回鶻馬爲誰  
一步一迴頭

隨營木佛賤於柴太樂編鐘滿市排虜掠幾何君莫問大船  
渾載汴京來

太樂編鐘元史禮樂志至元元年冬十有一月括亡金樂器散在寺觀民家者先  
是括到燕京鐘磬等器凡三百九十有大興府又括鐘磬樂器  
十事求進又檄各道宣慰司括到鐘三百六十有七磬十有一鐸一又中都宣德平  
順天河東真定西京大名濟南北京東平等處括到大小鐘磬五百六十有九其完者  
景鐘二鋪鐘十六大聲鐘十中聲鐘一小聲鐘二十有七編鐘百五十有五編磬七其  
不完者景鐘四鋪鐘二十有三大聲鐘十有三中聲鐘一小聲鐘四十有五編鐘二百  
五十有一編  
磬十有四

白骨縱橫似亂麻幾年桑梓變龍沙只知河朔生靈盡破屋

疎煙却數家

桑梓其地爲龍沙平郭璞語。案晉書宋傅瑗歎曰嗟乎燕黎將溷于  
異類桑梓其剪爲龍荒乎漢書敘傳龍荒朔漠顏之推觀我生賦神華

混爲龍荒皆作荒疑爲韻拘改字然咫尺龍沙已見之班超傳贊則作沙亦可

登珂山寺三首

澹澹長空白鳥迴江山都入妙高臺六鼇只解翻溟渤不駕

東南日觀來

太山在東南而此山不之見

悠悠誰了未生前一落泥塗又幾年堪笑長清郭明府再來

仍被葛藤纏

長清郭明府自省風世是此寺此邱及作寺碑宛然算沙語也

白日紅塵往復還深居那得似禪關出門應被山僧笑纔得

雲林半日閑

夢中作

夢人請賦四禽語其一泥滑滑也

春泥滑滑滿春山慚媿幽禽喚客還安得便乘雙翼去綠陰

清晝伴君閑

奉酬子京禪師見贈之什三首

南風穩送北歸船畱得虛名一指禪崧少詩僧幾人在因君

迴望一淒然

舊遊重憶故人詩一點青燈兩鬢絲不似戒壇明月夜杏花

香裏唱歌時

往在崧山時陪馮內翰雷御史  
游戒壇詩中所道蓋當時事也

兵塵千里邈相望亂後相逢話更長若見山堂憑借問幾時

同宿贊公房

贊公房

見少陵詩

杏花

桃李前頭一樹春絳唇深注蠟猶新只嫌憨笑無人管鬧簇  
枯枝不肯勻

聊城寒食

輕陰何負探花期白髮於春自不宜城外杏園人去盡煮茶  
聲裏獨支頤

姨母隴西君諱日作三首

竹馬青衫小小郎  
阿姨懷袖阿嬈香  
一龕白骨黃河隔  
遙望梁門哭斷腸

病起拈鍼眼未花  
團團兒女運司衙  
今年得在應猶健  
更好從頭說外家

寶鏡煌煌照九州  
埋藏曾及見諸劉  
鄧城今日無雷煥  
紫氣

誰當辨斗牛

陽曲劉氏家大寶鏡能照天地四方以前知休咎其家埋地中人不得見也明昌泰和中北方兵動渠父子欲卜之一日先以旃幕障中庭乃肩開門戶甚叢及掘鏡出光澤燭然一室盡明如初日之照鏡中見北來兵騎穰穰無數餘三方都無所睹因大駭口不可不可卽埋之姨母時伏牀下得竊窺焉兵火後此家唯一兒子在姨母能指鏡處存否則不知也故予詩及之

宿神霄北庵夢中作

案二卷有覓神霄古銅爵詩

素月流空散紫煙  
座中人物半神仙  
麗川往事渾如夢  
信手

題詩一泫然

夜雪

三更殘醉未全醒  
夢裏嬌兒索乳聲  
茅屋不知門外雪  
黃紬衾煖紙窗明

冠氏趙莊賦杏花四首

一樹生紅錦不如乳兒粉抹紫  
襜褕花中誰有張萱筆  
畫作宮池百子圖

文杏堂前千樹紅  
雲舒霞捲漲春風  
荒村此日腸堪斷  
迴首梁園是夢中

錦樹烘春爛不收  
看花人自爲花愁  
荒蹊明日知誰到  
憑仗詩翁爲少畱

東風誰道太狂生  
次第開花卻有情  
聞道紀園千樹錦  
一尊猶及醉清明

自趙莊歸冠氏二首

春華澹澹曉寒輕  
野草搖風半白青  
誰識杏花牆外客  
舊家曾近麗川亭  
杏園紅過雪披離  
楊柳無風綠綫齊  
寒食人家在原野  
乳鴉牆外盡情啼

戲贈白髮二首

鏡中昨日又明朝  
破屋春深雪未消  
摘下數莖聊自笑  
貴人頭上不相饒

貴人

初白云夢得  
語乃收之句

問愁何怨復何讎  
直要青春便白頭  
揅卻鏡中渾是雪  
且看渠待幾時休

戲題醉仙人圖

醉鄉初不限東西桀日湯年一理齊門外山禽喚沽酒胡盧  
今後大家提

提胡盧沽美酒禽語也

濟南雜詩十首

兒時曾過濟南城暗算存亡只自驚四十二年彈指過只疑  
來處是前生

四十二年

案本集三十四卷行記云乙未七月來游先生年五十六歲計兒時當十四五歲

匡山聞有讀書堂行過山前笑一場可惜世間無李白今人  
多少賀知章

匡山

記云匡山世傳李白嘗讀書于此

華山眞是碧芙蕖湖水湖光玉不如六月行人汗如雨西城  
橋下見游魚

華山

記云華不注山太白詩云眞華峯爲照也

吳兒洲渚似神仙  
罨畫溪光碧玉泉  
別有洞天君不見  
鵲山寒食泰和年

鵲山

居易錄元遺山濟南題咏尤多而工如濟南山水天下無雙山寒食泰和年等句古今膾炙具載集中。案濟南山水句集中無有乃元子欽詩語

石刻燒殘讌集辭  
雄樓傑觀想當時  
只應畫戟清香地  
多欠韋郎五字詩

讌集

案此辭卽指上文泰和寒食事記交不及無考

斫來官樹午陰輕  
湖畔游人怕晚晴  
一夜靈泉庵上宿  
四山風露覺秋生

靈泉

記云靈泉庵留宿者再

白煙消盡凍雲凝  
山月飛來夜氣澄  
且向波間看玉塢  
不須橋畔覓金繩

金繩

記云金縷泉有紋若縷余徘徊回泉上三習竟不見也

入秋雲物便淒迷一道湖光樹影齊詩在鵲山煙雨裏王家

圖上舊曾題

王清卿家有鵲山烟雨圖

王家

中州集王仲元字清卿

荷葉荷花爛漫秋鷺鷥飛近釣魚舟北城佳處經行徧畱著南山更一游

看山看水自由身著處題詩發興新日日扁舟藕花裏有心長作濟南人

題解飛卿山水卷

濟南記進士解飛卿從予游者十許日

平生魚鳥最相親夢寐煙霞卜四鄰羨殺濟南山水好幾時眞作卷中人

趙士表山林暮雪圖爲高良卿賦二首

圖繪寶鑑趙士表宗室善山水尤

喜作墨竹思致如郭玉秀潤過之

颺颺林響四山風雪後人家閉戶中應被火爐頭上說水邊  
清殺兩詩翁

黃塵遮斷山間夢白髮重尋畫裏詩好似玉溪溪上路醉和  
王老喚船時

玉溪新樂府水調歌頭注賦後新王丈玉溪溪在松高費莊兩山絕勝處也。嘉靖河南志元劉驥安陽河記云大元彰德路總管王公丁卯秋九月既望天高氣清山空野靜與參佐數騎出郭門西行一舍許聞勢稍服陀又六七里迤邐轉而下小川忽平展中有一溪沮水也其流深碧可愛尋見居民夾岸廬舍相望蔬畦竹塢上下基布宛如圖畫遺山嘗謂絕似玉溪此語誠不妄

### 倫鎮道中見槐花

名場奔走競官榮一紙除書誤半生笑向槐花問前事爲君  
忙了竟何成

### 題劉才卿湖石扇頭

歸潛志洛水劉肅才卿有歸潛堂詩。石抹世勳傳天興元年冬哀宗將北渡世勳率朝官劉

肅田芝等二十人求見仁安殿。本集三十三卷石橋記云安撫劉君才卿

幽磴雲凝雨未乾曲池疎竹共荒寒  
扇頭喚起西園夢好似熙春閣下看

聞歌懷京師舊游

樓前誰唱綠腰催千里梁園首重迴  
記得杜家亭子上信之欽用其聽來

杜家

案杜即仲梁信之即麻革欽用即李獻甫

鄭先覺幽禽照水扇頭

圖繪寶鑑宋鄭天民字先覺宣和中爲郎官山水師巨然

臨水華枝淡淡春水光華影兩無塵  
風流一枕西園夢惆悵幽禽是故人

龍泉寺四首

本集三十四卷東游略記龍泉寺平陰東南四十里齊天統中建寺時有石刻劉豫皇帝三年皇帝弟符改甲乙

院亦有碑又明昌中題名最多佛像古雅皆數百年物上方丈佛與龍泉觀音非疏唐人不能造

懸麻白雨映層崖過盡行雲晚照開  
可是登臨動高興馬頭

新自太行來

泉石煙霞自一家殘僧隨分了生涯雞鳴山下題詩客曾到

靈巖不用誇

靈巖

齊乘靈巖寺府南八十里靈巖山中其山與方山相連南接泰山北接龍洞極為深秀疑即水經注之玉符山也寺乃佛圖澄卓錫之地有立鶴泉佛日盤辟

支塔自山麓至寺門十餘里古松參天亦謂之十里松歷代碑志具存。考證縣志引齊乘云山與方山相連疑即玉符不知此山前後之水流皆與郎公谷水無涉其非

玉符不待辨也

河邊殺癩尚能飛無角無鱗自一齊甲子紛紛更兒戲壁間

休笑阜昌題

寺北齊時建又劉豫阜昌中刻石并題名

殺癩

北史齊文宣先是童謡云一東燕兩頭然河邊殺癩飛上天燕然兩頭于文為高河邊殺癩謂水邊如羊蓋指文宣帝名也于是徐之才張猛陳宜受禪

角鱗

秋澗集聞談劉齊王故事詩序云七月十三日宿阜城縣解教諭劉元輔話廢齊祖塋在縣南十二里今謂之御莊至今石馬在焉明日次元州陳教授又說

豫未貴時一日顧見一白龍見婦翁家大鏡中但無鱗與角耳婦翁亦見以女妻之資藉之力甚厚及生二子以鱗角為名或者謂二子長豫當大貴後果然

昌題

潛研政後唐冥福禪院碑云碑之下方刻聖符縣公據一道後題阜昌三年二月日給蓋偽齊劉豫年號也前云據崇法院主僧海嚴後云右給公據付崇法

禪院收執照會准此蓋冥福時已改崇法矣後列知縣事劉主簿高尉張三人押而不名前後鈐奉符縣印三方今在泰安縣城內。齊乘劉豫當游平陰龍泉寺有題題來者諱笑遺山後爲解嘲有河邊殺鑿云云然則豫在當日自有定論遺山何故曲爲之說蓋惡如此豈不爲斷腕后所笑耶自古經生文士學博才高而性癖譏嘲害理者不少如遺山之流可不戒哉。案先生中州集敘載甚略不加評語及其題名而云休笑阜昌者蓋爲國諱也然譏評已見于言外矣思容何知哉

遶渠寒澗夜潺潺說有蛟龍在石間可惜九天霖雨手一泐  
泉水伴僧閑

### 李進之迂軒二首

白髮歸來世事新書生風味是清貧欹欹歷落從人笑潦倒  
麤疎我自真

舉世營營共一途要來閑處費工夫入門且莫分賓主不但  
君迂我更迂

### 出鎮州

汾水歸心日夜流孤雲飛處是松楸無端行近還鄉路卻傷

西山入相州

過邯鄲四絕

富貴榮華一歎嗟依然夢裏說韶華十年幾度山河改空指  
遺臺是趙家

人事存亡不易知及時娛樂恨君遲後人共指叢臺笑三尺  
堯堦竟屬誰

川原落落曙光開四顧河山亦壯哉前日少年今白髮只應  
孤塢記曾來

死去生來不一身定知誰妄復誰真邯鄲今日題詩客猶是  
黃梁夢裏人

楊祕監馬圖

大青小青天馬姿楊侯房星非畫師忽見奚官記前事東華

馳道晚涼時

大小青

淦水集二青圖詩大青天驥之雲仍小青八尺猶龍騰

竹溪夢遊圖

意外荒寒下筆親經營慘淡似詩人何時萬頃風煙裏白髮刁騷一幅巾

藥正卿餉酒

宿醒未解渴生塵驚見王宏餉酒人獨恨文書困佳客不來同醉五更春

王都尉山水

畫繼王洵雖在成里懷去晉桑維遠聲色從事于畫畫作寶繪堂于私第之東以蓄其所有東坡爲之記其所畫山水學李成錢法以金礪爲之小景亦墨

作平遠故東坡謂晉卿得破墨三昧

平林漠漠數峯閑詩在巖姿隱顯間自是秦樓畫眉手不能辛苦作荆關

荆

五代名畫補遺荆浩字浩然河南沁水人五季隱太行之洪谷號洪谷子常畫山水樹石以自適著山水訣一卷

關

圖畫見聞志關全長安人工畫山水

從荆浩學有出藍之美馳名當代無敢分庭

### 贈絕藝杜生

迢迢離思入哀絃非撥非彈有別傳解作江南斷腸曲新聲  
休數李龜年

### 趙大年秋溪戲鴨二首

畫繼趙令穰字大年少誦杜甫詩見唐人外宏章偃志求其跡師而寫之不歲月間

便能逼真所作多小軸甚清麗雲景似王維汀渚水鳥多江湖意

寒沙折葦浙江灣詩在波痕滅沒間前日扁舟人老矣卻從

圖畫羨君閑

畫家朱粉不到處淡墨自覺天機深賣酒墟邊見崔白王孫

真有五湖心

宋元章畫史趙昌王友崔白俱可爲酒家避牆壁耳

崔白

圖畫見聞志崔白字子西濠梁人工花竹翎毛體製清瞻雅以取尚地雖得名然于佛道鬼神山林人獸無不精絕

自題二首

其笑詩人太瘦生誰從慘淡得經營千秋萬古迴文錦只許蘇孃讀得成

千首新詩百首文  
藝羹不糝日欣欣  
鏡中自照心語口  
後世何須揚子雲

北歸經朝歌感寓三首

南來山勢漸坡陀  
蕩蕩川涂接大河  
馬上哦詩無好語  
聊從白堦記朝歌

黃屋何曾土作階  
禍基休指九層臺  
書生不見千秋後  
枉爲君王泣玉杯

墨翟區區不近情  
迴車曾此避虛名  
采薇唯有西山老  
不逐時人信武成

外黃道中楚王廟荆公有誰合軍中稱亞父卻須推

讓外黃兒之句因為范增解嘲

王安石詩鄴人七十漫多奇為漢殿民了不知誰合

軍中稱亞父直須推讓外黃兒

一怒屠城一說留書生剛為范增羞軍中老子關何事付與

兒曹調沐猴

題蘇氏寶章

涇水集三蘇帖詩他年鴻雁各分飛風雨蕭蕭有所思猶記讀書懷遠驛夜深燈火對秋時君家一口會三蘇

人間今古無時向明窗展橫幅不須更寫德星圖秋潮集題蘇氏寶章後忠定二公書金聲玉振如清廟之瑟一倡三歎有遺音者矣今觀追過等帖筆勢圓熟有伯父無格至遲之此幅為尤佳所謂王謝子弟以生長見闕風格自超人羣也○玉堂嘉話蘇氏寶章在東坡黃門及邁退等帖遲即穎濱子也

二老風流有典刑諸郎蘭玉映堦庭峨眉寶氣千年在未數

陳家聚德星

長公忠義如顏平原次公冲淡似林西澗故字畫有不期合而合者最後數帖所謂蘇氏三虎叔黨最怒耳

劉氏明遠庵三首

豪氣元龍百尺樓功名場上蚤抽頭路人不識閑居士袖手  
雍容活兩州

世間無物礙虛空宴坐經行一體同老眼不應隨境轉江山  
元只在胸中

落落雲間晚照開上方別有妙高臺栽花種柳明年了拄杖  
敲門日日來

題李庭訓所藏雅集圖二首

中州集李宜陽過庭字庭訓武寧人貞祐二年進士至宜陽永寧紫

陽三縣令所去見思入爲右曹掾斷獄寬平高妖賊李亨首坐所誣誤數百人皆從輕法正大中擢右三部司正終于昌武軍節度副使少日從太原王正之學故詩文皆有可觀人初與交者多不能舍久之知其爲溫質長厚人也王寅四月暴卒于東平子尋字華甫○又劉祖謙雅集圖詩得省關駟野鶴孤玉京人物會仙圖後求且其輕題品席上揮毫有大蘇

萬古文章有至公百年奎壁照河東衣冠忽見明昌筆更覺  
昇平是夢中

景星丹鳳一千年合着丹青與世傳誰畫風流王李郝大河

南望淚如川

王謂仲澤李謂長源郝謂仲純

郝仲純

中州集郝內翰侯傳子居中字仲純樞密院令史出身嘗刺坊州人物楚楚所謂文獻不足猶超人羣者也正大末除鳳翔治中南山安撫使詩亦

有功

南關二首

地志河東南路沁州武鄉縣南關鎮

風裏秋蓬不自由一生幾度過隆州無情團柏關前水流盡

朱顏到白頭

路轉川迴失繫舟更教兩驛過徐溝多情團柏關前水却共

清汾一處流

是日自徐溝宿南關

團柏

地志河東北路太原府祁縣團柏鎮

馬坊冷大師清真道院二首

本集三十五卷清真觀記云修武清真觀在縣北馬坊又云舍傍近

出大泉源千畝稻塍蓮蕩東與蘇門接茂林修竹往往而在又云正大辛卯志敏之徒冷德明者復臺居之又清真道院營建疏

水際茅齋星散居白雲閑伴五溪魚茂林修竹山如畫蘸碧  
軒中恐不如

蘸碧軒

新樂府有超化蘸碧軒得  
欽叔書洞仙歌詞卽此

枯蒲折葦障清灣千里風荷指顧間安得西湖展江手亂鋪  
雲錦浸青山

靜中人境兩翛然我亦因君有靜緣已約青山來枕上水亭  
風榭看明年

惠崇獐猿圖

月嘯煙呼本不羣筆頭同是一溪雲野情山態令人羨世路  
機關不似君

寄史同年二首

本集廿二卷藝表邦直諱元姓史氏武  
涉人興定五年詞賦乙科終觀察判官

情話通宵慰別離殷勤釀酒趁花期沁南口道梅花蚤猶較

歸程十日遲

沁南

地志河東南路懷州沁南軍

相君許送買山錢晚歲鄰居定有緣一樹梅花一尊酒知君東望亦淒然

宋周臣生子三首

試手君家助喜詩秋風丹桂長新枝昂霄聳壑他年見水月

同宮記此時

水月同宮五星家謂人以此時生者長必貴

玉季金昆世共賢天將文筆付家傳清新未要梅花賦射虎

畱看第二篇

鄉先生宋濟川以射虎詩著名

射虎

中州東宋孟州緝傳濟州長子人以省徽從吏部尚書梁肅使宋副趙王府直臣獵淮上射一虎斃之濟川有詩紀其事語意倏拔刻石于鎮淮堂。秋澗集

既雪齋書宋孟州獵虎詩卷後昔與陵選建臣奉使江左須得才辨有聞望者若宋孟州射虎詩清雄振厲遠而有光華大定人文之盛疑可見矣雪中展觀于曾孫秘監處令人三夜清興四發今秘監以盛問德義

又為青宮所宜禮所謂黃門有父風也

雛鳳來時鶴卵成  
兩兒前後不多爭  
阿寧解語應須道  
猶是渠家百日兄

乞酒示皇甫季貞

醉頭慵舉睡昏昏  
夢裏青旗雪擁門  
枕上一杯風味好  
糟牀何處得茶渾

李白騎驢圖

八表神游下筆難  
畫師胸次自酸寒  
風流五鳳樓前客  
枉作襄陽雪裏看

許由擲瓢圖

不知黃屋不知堯  
喧寂何心計一瓢  
我是許由初不爾  
只將盛酒杖頭挑

九月晦

松楸千里動悲哀說道迴家蚤晚迴九月忽驚今日盡滿城  
風散紙錢灰

雜著

燒殘芻狗不能神一色貂裘繡帽新好箇路傍官堠子經年  
端坐看行人

路傍堠

韓愈詩堆堆路傍堠一雙復一隻

送窮

送君君去欲何之暫去還來也不辭但媿苦無相贈物柳船  
輕似去年時

卽事

四長東州貢姓名阿茶能誦木蘭行元家近日添新喜掌上

寧兒玉刻成

寧兒叔開小字阿茶第四女字叔閑

侯相公所藏雲溪圖曾命賦詩三首但記其一云祖

道東門未有涯田君方駕入宮車祇應千古浪溪

路人說山中宰相家相公以體重不任步趨詔許

駕小車至朝殿外門故余詩及之北渡後往東平

路經雲溪因爲之賦

歸潛志侯平章摯字莘鄉東阿人少擢第慷慨有爲貞祐初北兵圍燕都公由中都

趙使請出募軍已而嬰城有功自行戶部侍郎遷河平軍節度使宣宗南渡爲參知政事出鎮東平移鎮下邳所至吏民安晏後入朝遷左丞正大初進平章政事封戴國公居相位憤無所施請守大名詔出行尚書省未幾還朝致仕居南京有園亭蔡水濱公日在間與耆老燕飲後南京降以前宰執爲北兵所殺爲人有威嚴御兵人莫敢犯在朝遇事亦敢言頗喜薦士如張文舉雷希顏麻知幾皆由公進用南渡後宰執中人望最重。淦水集雙溪記尚書右丞侯公領東平之明年買田于黃山之下曰浪溪浪與狼同聲因以名之浪溪東二十里而近有佛屋卽公之舊隱讀書處也溪廣百畝上納天光下浸山垠中植亭館蔭以花竹命之曰雲溪云。又雲溪圖詩朝遊雲溪上莫遊雲溪下不知雲溪雲去作人間雨流水赴大壑白雲思故山何時溪上人心與歸雲閒黃公山下雪溪路十里溪光照雲樹溪流歷歷讀書聲想見先生舊遊處溪上老僧今白頭天書招我歸來休圮上方傳黃石略山中未暇赤松遊我公昔年提孤軍旌旗絳幘張魚鱗鯨鯢沸天海水軍渴飲嚼齒欲見麒麟兒十萬寄一身咸陽白骨迴

青春九重致忠天爲擊殿前論事氣益振滄海未全歸萬貢山東且願變  
齊民匣內寶書金屈戌要問瑞節玉麒麟衛國錦衣歸故里代公髯髮更  
惹親他年鐘鼎出元勳二十四考中書君整頓乾坤濟時了飄然卻返雲  
溪雲○中州集雷淵賦侯相公雲溪云相君襟度本汪洋戲墨波池便渺  
茫解起晴雲作霖雨更邀明月貯清光千重複嶺藏仙境萬斛香泉釀醉  
鄉畢竟歸符抱不得煙波空效五湖蒼○秋澗集雲溪先生畫像詩大定  
明昌五十年聲明文物出中天畫  
圖一識雲溪老畫風流墮眼前

黃山圖子翰林詩千里東州有所思前日相公門下客國亡  
家破獨來時

陳德元竹石二首

一片春雲雨未乾兩枝新綠倚高寒瘦龍不見金書字試就  
宣和石譜看

瘦金

書史會要宋徽宗行州正書初  
學薛稷發其法度號瘦金書

萬石綱船出太湖九州膏血一時枯阿誰種下中原禍猶自  
昂藏入畫圖

同漕司諸人賦紅梨花二首

梨花曾比太真妃  
別有風流一段奇  
白雪爲肌玉爲骨  
淡妝濃抹總相宜

淡妝

東坡句

瓊枝玉葉靜年芳  
知是何人與點妝  
可道海棠羞欲死  
能紅能白更能香

吳子賢構庵二首

人道構形百醜全  
我知道造物向君偏  
世間正有明堂柱  
偃蹇風霜得幾年  
廣莫初無匠石過  
一丘一壑奈君何  
世間正有明堂柱  
春草輸贏較幾多

太一蓮舟圖三首爲濟源奉先老師賦

老師吾宗盟之異  
三十五卷通仙記

新樂府有乙亥春濟源奉先觀賦杏花詞

泠泠風外到仙臞琢玉羊欣定不如六合空明一蓮葉更須

遮眼要文書仙人在蓮葉臥看書

仙人寧得此婆娑亡奈丹青狡獪何我與太虛同一體也無

蓮葉也無波

泰一青藜出漢年明窗開卷一欣然憑君莫問題詩客不是

韓駒第二篇

韓駒漁隱叢話李伯時畫太乙真人臥一大蓮葉中手執書卷仰讀蕭蕭有物外意子蒼有詩其上郡齋讀書志王黼嘗命韓子蒼詠其家藏太乙真人圖盛傳一時

案草廬淵穎皆有圖詩

遊天壇雜詩十三首

芳樹陰陰鳥語譁綠雲晴雪映紅霞青山可是堪人恨藏著

中巖十里花

漫山白白與紅紅小樹低叢看不供總道檀花香氣好就中

偏愛玉瓏鬆

花名有玉瓏鬆

只願長城沒徹頭豈知蒸土更堪愛秦人若見千年後抱杵

臨洮老死休

過秦溝

溪童相對采椿芽指似陽坡說種瓜想得近山營馬少青林  
溪處有人家

仙貓聲在洞中聞憑仗兒童一問君同向燕家舐丹鼎不隨

雞犬上青雲

仙貓洞是日兒子叔儀呼貓應者一士人傳燕家雞犬升天貓獨不去

仙貓

續夷堅志天壇中巖有仙貓洞世傳燕真人丹成雞犬亦昇仙而貓獨不去在洞已數百年游人至洞前呼仙哥聞有應者工屋令臨漳薛鼎臣呼之而應觀

爲余言已亥夏四月予自陽谷當將之上方過洞前命兒子叔儀呼之隨呼而應聲殊清遠也因作詩云

諸峰羅列擁朝臺落日行雲一望開絕似太山山上看分明

齊嶺是徂徠

空翠霏煙海浪深鰲頭鵬背半浮沈不知腳底山多少還盡平生未足心

還盡

東坡句

湍聲洶洶落懸崖見說蛟龍壁石開安得天瓢一翻倒躡雲

平下看風雷

時旱甚故云

天瓢

蘇軾詩馬上傾倒天瓢翻

仙壇倒影鳳麟洲一道雲光插素秋也是天公閑不得海東

移著海西頭

鳳麟洲

十洲記鳳麟洲在西海中  
央仙家煮鳳喙及麟角處

道民終不忘天台姓字依然在蜜崖爲問松臺千歲鶴白雲

何處不歸來

近歲盧氏蜜崖人跡不及處有題字云道民  
天台司馬承禎過松臺即白雲老葬地也

蜜崖

續夷堅志明昌末盧氏山蜜崖石壁高峻非人跡所到忽有題字云道民天台  
司馬承禎過字大如盤墨色光瑩而紫余過中巖謁白雲先生祠碑載承禎君

松臺因  
有詩云

仙人龍蹻玉爲鞭石穴留書世不傳弱水蓬萊三萬里青山

今古幾何年

近年人有得司馬先生石穴所藏丹經于山陽

龍蹻

抱朴子乘龍蹻可以周流天下蹻道有三一曰龍蹻二曰氣蹻三曰鹿蹻

石穴

本集卅五卷通仙觀記王辰之變人有得鍊師所藏丹訣于此

山石穴中者曰真元君問覽八極天老相風后侍方明力牧常介先昌宇從六宮宮主悉以天衆會于天壇雲臺論三洞祕交普明法要問答已竟太乙現深明輪問雲軒羽蓋滿空界山川雲日黯無品光元真拜跪于瀛壖之上曉暖之際太乙與無央仙悠隱于元中其始末大略如此其後記云余留于王屋清虛洞側獲真篆仙經二品一曰元精二曰丹華玩其真跡味其經旨乃知龍章鳳篆與世筆殊絕聖法仙經暨凡文異軫徒懷悵望深恨不睹其人然積習彌久探賸淵微希髣髴而已

風期身後復身前一讀丹華似有緣八表神遊吾豈敢或能  
搖筆賦垂天

擬著茅簷北斗平殘年細讀洗心經詩成應被盧仝笑曾見

青山養伯齡

盧仝送伯齡出山云伯齡不厭山山不養伯齡子以早當山山故自戲云北斗平在天壇之後

初發潞州

潞州住久似并州身去心畱不自由白堦亭亭三十里漳河  
東畔幾迴頭

雜詩六首道中作

鼠肝蟲臂復何辭坎止流行亦有時已被吳中喚僴父卻來  
河朔作炎兒

僴父

蘇軾詩畢竟擬爲僴父憑君說與吳儂

隆州兵騎往來衝客路灰郊更向東大似天教浣塵土數程  
都在水聲中

懸崖飛瀑駭初經白玉雙龍掣迅霆卻恨暑天行過速不曾  
赤腳踏清泠

黃華北下馬陵南佛屋燒殘有石龕想是故鄉行欲近粥糜  
渾覺水泉甘

莊休通蔽互相妨鄉社情親豈易忘司命果能還舊觀觸體  
端合羨侯王

通蔽

謝靈運詩通蔽互相妨

司命

屈原九歌有大司命

鄉關白日照青天徒步歸來亦可憐袖裏新詩一千首不愁  
錦繡裏山川